

7

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 21 1941

T5781/2180(1CT)

奉

天承運。

皇帝制曰。朕惟致治之道。必君臣一德。賢才奮興。孝悌申於黨庠。仁厚洽乎海宇。然後一道同風。克躋郅隆之治。朕荷

天庥。丕承大統。仰惟

聖祖仁皇帝撫御寰區。六十餘年。本至誠以御下。頒聖諭以教民。故能使俊乂盈廷。民風淳厚。朕盱眙食宵衣。惟恐一事未理。不克丕紹前烈。尚賴股肱耳目之司。匡所不逮。周易泰卦。言天地交而萬物通。上下

哈佛大學漢和
圖書館珍藏印

交而其志同。謂君推誠以任下。臣盡誠以事君。此朝廷之泰也。朕推心置腹。以至誠待下。大小臣工。宜精白一心。昌言無隱。今果能以嘉謀入告。無媿責難之義歟。抑或有依違瞻顧。不克以至誠報上者歟。周禮大司徒。以三物教萬民而賓興之。卿大夫三年則大比。考其德行道藝而興賢者能者。至州長黨正族師。各以歲月考校。故其時人知奮勵。克崇實學。今三載賓興。猶行古之道也。朕加意作人。特開恩科。何以使道藝兼脩。德行無忝歟。抑司造士之責者。宜倣古歲月考校之制。俾文行並茂。

歟。百行莫先於孝。六計必主於廉。今欲使家有孝子。國有廉吏。所以倡導鼓舞之者。其道安在。至帝王之治。始於家邦。終於四海。今欲比戶可封。何道臻此。放勳由克明峻德。以至黎民於變時雍。周公召公。布王化於二南。意風化始於君。成於臣。漸仁摩義。非一手足之烈歟。夫君明臣良。聯為一體。必能旁招俊乂。連茹彙征。賢才自然振興也。敦崇孝行。砥礪廉隅。風俗自然醇樸也。爾多士積學有年。必有以抒夙抱而佐朕之新政者。其悉心以對。朕將親覽焉。

臣于振

臣對。臣聞帝王之膺圖御宇。而致重熙累洽之治也。將使耳目股肱。共為一體。而贊勳左右。有賡歌喜起之風。將使智愚賢否。共歸一途。而里塾黨庠。有棫樸菁莪之澤。將使立名砥節者。修之於家。施之於國。而言揚行舉。皆有體有用之材。將使化民成俗者。本之於身。徵之於民。而風流令行。皆無黨無偏之治。是惟堂廉之上。一心一德。故宮中府中。無不有至誠愷惻之意。以浹洽乎其間也。亦惟四海之遠。一道同風。故國學

鄉學。莫不有濯磨砥礪之心。以鼓舞於其際也。惟上之風示者深。故敦崇至性。謹飭廉隅。而蒸蒸丕變者。不遺於出處也。惟下之觀感者切。故入則橫經。出則負耒。而藹藹可風者。不隔於遠近也。唐虞三代。所以正朝廷而立百官。始於家邦。放乎四海。用以成賡拜之風。致親遜之俗。勵士臣之節。端風化之源。協於上下。以承天庥。諸福之物。可致之祥。莫不畢致者。未始不由乎此。欽惟

皇帝陛下。

道叶義圖。

德敷禹甸。

仁心廣被。紹休風於虞夏商周。

義問昭宣。訖聲教於東西南朔。

有馮有翼。有孝有德。謀嘉申錫於無疆。

不競不綌。不綱不柔。鴻業欽承於有永。

闕門顚俊。擴自古未有之宏綱。蕊榜珠聯。日邊奏

五色雲開。欣值祥光繞電。

明目達聰。際曠代未逢之盛遇。彤墀魚貫。天上覩

九苞彩煥。遙聞華渚流虹。固已彌性優游。純禮

鞏固。從容中道。第祿用康。北里獻其嘉禾。九士

歌其樂愷矣。乃

聖情若谷。安益求安。進臣等於

廷而策之以君臣交泰。賢士彙征。興孝崇廉。化民

成俗之道。臣之愚陋。何足以仰酬

清問。然對揚之始。敢不竭管窺之一得乎。伏讀

制策有曰。君推誠以任下。臣盡職以事君。大小臣工。

宜精白一心。昌言無隱。此誠萬古明良交泰之

盛心也。易曰。王臣蹇蹇。匪躬之故。詩曰。夙夜匪

懈。以事一人。古之為君者。有所不得已於其臣。

而爲手足。爲腹心。不以廉遠堂高。而廢都俞吁
咈之盛。爲臣者。有所不能已於其君。而知必言。
言必盡。不以時和物阜。而忘危明憂盛之心。故
漢有直言極諫之科。而唐置補闕拾遺之職。至
於宋世。雖不爲諫官者。亦許陳詞。若在常參。卽
未經預牒者。不拘班次。凡以抒百爾之忱。而作
敢言之氣也。我

皇上勵精圖治。夙夜疇咨。屬在臣工。無不可以贊襄
國是。四海之利弊。皆以洞悉。九野之情僞。皆已
周知。朝野遠近之制度文爲。皆已燦然而大備。

前古後今之豐功偉業。皆已兼營而并包。猶且
以依違瞻顧。慮任其事者。不克盡其誠。則凡錫
主擔爵者。疇不動推心置腹之感。執簡待漏者。
疇不有天地父母之思。至於風動時雍。有欲言
而無可言者。泰交之盛。斯爲至矣。

制策有曰。三載賓興。猶行古之道也。何以使道藝兼
修。德行無忝。此誠萬古興賢育才之至意也。古
者匹夫有善。可得而舉。匹夫有不善。可得而錯。
蓋其時。黨正閤師。養之於小學之中。司樂司成。
納之於大學之道。而又有三年考校之法。比年

考校之法。離經辨志。敬業樂羣。至於經明行修。有造有德。所以優游而積漸者。非一日矣。我皇上聰明天縱。留意作人。廣額增科。求才若渴。天下之士。固皆喁喁而向化。顧形而上者謂之道。行而下者謂之藝。故爲士者。不患其藝之不工。而患其道之不立。見之於言。謂之文。措之於躬。謂之行。故爲士者。不憂其文之不著。而憂其行之不脩。誠使造士者。仿古歲月考校之制。倡率於上。或效蘇湖經義治事之法。或考朱子分年治經之科。務其實。勿務其名。聽其言。必觀其行。何

患道藝之不兼。而文行之不茂歟。

制策有曰。百行莫先於孝。六計必主於廉。欲使家有孝子。國有廉吏。思所以倡導鼓舞之者。此誠萬古興崇民行之良規也。嘗考西漢。孝廉各爲一科。至東都。合而爲一。故任延、張敞。俱以孝稱。孟喜、師丹。兼因廉著。若杜氏之一門三舉。太丘之羔雁成羣。漢隋以還。僅見而已。至於正觀之孝廉。不能稱述。孝經開寶之孝廉。止可隸諸兵籍。舉士舉官。胥失之矣。我

皇上下大孝格天。至誠動物。凡具明發之志者。無不誦

白華之什。而有懷二人。凡矢素絲之節者。無不咏羔羊之詩。而秉心正直。顧其倡導而鼓舞之者。則在鄉黨之中。示之以長幼之鵠。使出入進退。皆有常經。父兄之教。既先。子弟之率。不謹者。未之有也。又在方面諸臣。明示以冰蘖之操。使州邑下僚。洗心革面。大臣既已守法。小臣猶有不廉者。未之有也。如此。則家有孝子。國有廉吏。而三代郅隆之治。不外乎是矣。

制策有曰。風化始于君。成于臣。漸仁摩義。非一手一足之烈。此萬世移風易俗之盛軌也。夫書陳二典。而時雍風動。本於峻德之克明。詩紀二南。而江漢汝墳。始於宮庭之寤寐。恭儉之主。野有蓋藏。而風成刑措。慈惠之世。政無更革。而遐邇交孚。蓋有動乎其天者。而風俗之厚薄。乃因之而轉移也。我

皇上建其有極。執兩用中。光天之下。至於海隅蒼生。罔不時乂。風行俗美。家室和平。蓂以加矣。使內外臣工。正已率物。以謹厚者端其本。而奇技淫巧。不得以眩其耳目之良。以醇樸者還其天。而曲學異端。不得以搖其固有之性。則上行下效。

如影響之相符。此感彼從。若風草之共被。遊其
字者。不識不知。而渾忘乎帝力。歌其澤者。以恬
以養。而無間乎親疎。風俗之丕變。豈意量所能
及哉。要之。我

皇上以法天行健之學。致憲天出治之政。則臣隣交
儆。而俊乂畢升。孝秀充廷。而風聲遠被。於以登
三咸五。成久安長治之模。體元長人。肇億萬斯
年之慶。四靈爲畜。百穀用成。先天而天弗違。定
命而命不易。我

國家重熙累洽之休。基諸此也。臣草茅新進。罔識

忌諱。干冒

宸嚴。不勝戰慄隕越之至。臣謹對。

臣戴瀚

臣對臣聞帝王之膺圖御宇。而有道萬年也。必
有法天不息之心。尤必有本天不易之政。統乎
心與政。而無弊者。則中爲要焉。以執中者。存諸
心。斯屈伸張弛。參贊位育。而當然之矩。不失於
毫釐。以用中者。播諸政。斯進退損益。輔相裁成。
而秩然之衡。不勞於幾務。蓋心者。所以立極。經
緯萬端。不崇朝而偏天下者也。政者。所以制事

斟酌百王必盡善盡美而合天人而一之者也
二者交相維繫而不可爲重輕聖人知其然故
其體在乎樹仁義中正之準由宮庭而畿甸由
邦國而要荒時雍於變較風雨露雷而更神其
用在乎萃明良啓沃之功由股肱而耳目由譽
髦而里閭聚精會神比樸棫菁莪而更廣泰交
盛而府事修正德利用厚生以時中而悉順俊
乂登而風俗淳時憲欽若從又以建中而大同
唐虞三代之隆修道以恢無外之溢樹人以成
不拔之基久安長治而享祚無窮皆由斯術也

欽惟

皇帝陛下

乾元協撰

泰運凝庥

濬哲文明德軼重華之盛

剛健中正功歸純粹之精

緝熙集念典之光作肅作乂作哲作謀修夔倫爲

繼述

神化速置郵之應有容有敬有執有別盡血氣以
尊親

永萬年寶曆常新天瑞降地符升禾登六穗著茂
百莖猶盱食宵衣而惠鮮懷保

偏九域亶聰坐照大綱舉細目張阜成兆民允釐
庶績更求賢籲俊而拔茹彙征固已高明博厚
綜禮樂兵農而咸理覆幬持載極東西南朔而
蒙休蕩蕩巍巍密性功於精一師師濟濟合寮
冢以寅恭陰陽和而風雨時刑罰清而人民壽
百靈効順河嶽懷柔萬福來同岡陵保艾矣乃
聖懷時切夫淵冲咨儆彌勤諸鞞鐸泰岱增高于
土壤河海廣納夫細流進臣等於

廷而策以嘉謨入告德藝並崇孝廉倡導之權仁
義漸摩之化臣愚何足以知之然幸生熙皞之
世服德食疇匪伊朝夕沐浴詠歌之下於古訓
竊有聞焉我

皇上天開文運加意旁求其鼓舞而振興之者亘古
所未經凡有識知莫不奮發激昂爭先拜獻臣
敢不竭智畢慮仰答

清問以管見乎伏讀

制策有曰君推誠以待下臣盡誠以事君大小臣工
宜精白乃心嘉謨入告無媿責難之義煌煌

天語誠集思廣益之盛心也易曰天地交而萬物通
上下交而其志同書曰后克艱厥后臣克艱厥
臣夫聖人躬生知之德開天明道覺世牖民而
問察隱揚下至適人徇路瞽史工師之有誦有
諫者何哉誠以四海九州之大萬事萬物之宜
措置必出于大公而不肯以自用也猶恐揚日
月之明抗雷霆之威足以懾言者之氣用是開
誠布公推心置腹之使盡其情爲之臣者其可
不仰體延納之弘而不以責難自靖乎誠知高
爵厚祿君厚待夫我者我不可薄待吾君遺大
投艱君重任夫我者我不可輕報吾君是非可
否陳其寔而無涉于依違利害安危思其防而
勿隣于瞻顧本正心誠意以修於家則無牽乎
榮利而直氣自伸本濟人利物以獻於廷則無
奪於偏私而讜言自出我

皇上善與人同達聰明目言有一得立布諸

皇猷誠堯舜之衷萬世一遇者也爲臣者誠能以匪
懈之忱効匪躬之義視一夫不獲爲已辜視一
事不治爲已過所謂上下相得益彰者豈不休
哉

制策有曰加意作人特開恩科欲使道藝兼修而德行無忝此誠興賢育才崇尙實學之至意也夫士者四民之首辨材論官之所以爲用也夫名之曰賢則必核其躬修名之曰能則必程其智畧故非徒以文藝鶩聲華云爾也昔人舉賢良方正稍爲近古蘇軾曰上以名求之下以實應之何如求以實而應以實者爲尤得乎故必復周禮鄉三物教萬民之制六德以養其源六行以踐其跡六藝以善其用徼歲月考校之制而州長黨正族師寓柄于造士之官稽察嚴則僥倖絕僥倖絕則砥礪勤庶乎三代之英大道之行可復于今日矣

制策有曰百行莫先于孝六計必主以廉今欲使家有孝子而國有廉吏是又慎徽五典澄叙官方之極則也臣愚以爲孝與廉有共爲治者資於事父以事君求忠臣於孝子之門是也孝與廉有各爲見者孝子不匱永錫爾類一介不以取諸人繫馬千駟弗是者是也要之親親而仁民仁民而愛物故必士盡顯揚之實民懷罔極之思則天下皆和氣之祥而悍戾不生爭訟不作

矣不隕穫於貧賤不充詘於富貴故必上謝苞
苴之餽下杜朶頤之私則天下皆潔清之象而
關節不到奸僞不興矣是有勸勵之道焉擇其
宗族鄉黨之間共知夫色養之實者可爵可旌
而不遺於草野擇其錢穀刑名之地歷試夫冰
蘖之操者可遷可賞而不忽於卑微身任風化
者又力行以示其歸如仇覽之爲鸞鳳職任倡
率者又內省以植其表如楊震之却夜金倡導
鼓舞必有旋至而立效者也

制策有曰至治始於家邦終於四海欲使比戶可封
漸仁摩義此又端本澄源儀刑式德之盛軌也
夫放勳之業至于光被四表而握其樞於峻德
姬公之勲至于化行江漢而崇其基于闕雖蓋
民可使由不可使知非有以欺罔而束縛之也
上行下效捷於影響而速于稭鼓豈不以君始
之而臣成之者乎先儒西銘之言曰大君者天
之宗子其大臣宗子之家相也揆乎其勢則堂
上堂下有千里百里之遙論乎其德則宮中府
中皆天叙天秩之理由邦家而訖于四海者衣
剋瞻視之必嚴執爵割牲之必謹絃繩縹手之

必親蘋藻羔羊之必飭審端擇術則比戶可封
非家喻而戶曉者矣要而論之我

皇上基命宥密一出于執中之心潤色鴻猷一出于
用中之政則兼聽並觀而非驚崇術立教而非
苛孝廉之選接跡於海隅淳樸之風深淪於肌
髓我

國家重熙累洽必至于萬年也臣草茅新進罔識

忌諱干冒

宸嚴不勝戰慄隕越之至臣謹對

臣楊炳

臣對臣聞帝王之纘承大統而建極綏猷也必

其精神奮勵足以鼓舞天下之志氣而後承流
宣化者皆有震動恪恭之美必其道德和順足
以涵濡天下之性情而後移風易俗者咸有時
雍熙皞之休蓋當久道化成之後太平既有象
矣而廢弛或從此開當聖作物觀之時兢業所
共凜矣而刻覈或虞太過惟以惇大者立其體
則不至有刻覈之弊而太平永保于無疆以明
作者致其用則不至啟廢弛之漸而兢業相警

于無逸由此以聯泰交而君臣一德喜起所以
載賡也以厲士習而俊又振興人材所以日盛
也以興孝廉而實德中孚至治所以樸茂也以
厚風俗而氣象恬熙大化所以翔洽也此唐虞
三代之世師濟盈廷上下共功以致麒麟遊而
鳳凰鳴甘露降而醴泉涌萬象含輝百靈效順
諸福之物可致之祥莫不環至而立効者皆主
德之勵精成裕有以積之甚厚而感之甚神也
欽惟

皇帝陛下

義畫體元

禹疇歛福

握乾維而御世八荒欣丕冒之寬

揭離照以當陽九有遂近光之願

性焉安焉之謂聖不思而得不勉而中猶稟鑒觀

于旦明

鼓之舞之以盡神不賞而勸不怒而威益勤咨警

于宵旰

蠲租發粟必使物物各得其所而且秩五禮敷五
教敬五行普德使于千八百國

升賢顓俊務俾人人樂効其長而且闢四門達四
聰明四目垂休烈于億萬斯年固已至治有徵
道並隆乎古帝昇平有象業遠邁乎百王乃

聖懷無逸求治彌殷進臣等於

廷而策以明良泰交之雅育德造士之方舉孝興
廉之法時雍風動之休以臣弁鄙無文何足仰

承

清問然對揚伊始顧敢依違隱忍以負幼學壯行
之志乎伏讀

制策有曰君推誠以御下臣盡誠以事君此朝廷之
泰也今心誠置腹以至誠待下則大小臣上各
宜精白一心以至誠報上大哉

王言固天下萬世所共仰也臣觀古昔盛時其君子

臣皆有家人父子之誼而無猜嫌疑忌之心其
臣于君皆有盡忠補過之忱而無依違瞻徇之
念集在書曰臣哉隣哉隣哉臣哉蓋言一德一
心之朝君臣交警保治孜孜無時可滋其怠荒
也今

聖神御極百度維新凡百爾臣工得毋因世道之休
隆或致幾務之疎畧乎惟本平日戒懼謹獨之

功以厲其靖共匪懈之節虛心以審幾而不存
偏陂之見實心以任事而不存推委之思去私
而奉公忘家而謀國力勤志銳智勇奮發於幾
先則無不飭之官方矣獨立而不懼共事而無
嫌誠至明生功名總期于報主則無不盡之職
業矣周易所謂上下交而其志同者不可再見
於今日乎伏讀

制策又曰三載賓興猶行古道然何以使道藝兼修
德行無忝此非造士之責而誰責歟夫古之造
士者有三物六行之設有鄉舉里選之法有戒

休董威之具故其時之士咸欣欣然有樂於爲
善之思力行不倦而無自棄之意處則有砥節
勵行之修出則有安上治民之畧而今之士異
矣所徇者聲華而門內之實行不修也所矜者
結納而居稽之本務多疎也當其未遇則所憂
者在功名而不在學業及其既遇則所求者又
在利祿而不在功名蘓子曰上以名求之下以
實應之若上以實求之而下以名應之其可乎
於此而欲大去其積習鼓厲其將來俾之克崇
實學而不入於浮僞苟且之習則其責在學臣

與教官誠使膺斯職者仰體作人之至意痛革
因循之陋弊樂育有方考校有條情面不徇賄
賂不通則文行兼優者既有不次之擢而委靡
弗振者有不爭自濯磨以共勉於同文之宇乎
伏讀

制策又曰百行莫先於孝六計必先於廉必使家有
孝子國有廉吏而因求所以倡導鼓舞之術此
誠崇實黜浮之至意也昔周禮以鄉三物教萬
民而賓興之二曰六行孝友睦婣任卹冢宰以
六計弊羣吏曰廉善廉能廉敬廉正廉法廉辨

則孝爲立身之原而廉爲居官之本也明矣然
徒務乎孝之名而實德有虧則可以欺一世之
人而不能免鄉里之譏議儼然居浚明之列而
反不若草野之樸誠徒徇乎廉之迹而實行不
孚則雖侈潔清之望而清議已窺其微縱標耿
介之操而有識已訛其後則誠僞之介其可不
辨哉必也以彝倫爲大經以名教爲大閑務其
肫誠去其僞妄不敢欺世而盜名不敢違道以
干譽而後可以表帥士民風厲兆庶也伏讀
制策又曰風化始於君成於臣漸仁摩義非一手足

之烈臣反覆思維益見我

皇上之維持風化者洵有加而無已也夫五方之風氣不齊生人之性情各殊爲上者豈能一一而轉移之亦在得其人以倡導之耳無以爲之倡則或相沿於浮僞或日習於奢靡或爭趨於凌兢有以爲之倡則浮僞者亟返樸誠奢靡者漸敦儉約凌競者共效謙和上作下應理有固然而要其所以倡之者大畧有三師儒之官董其教事型仁講讓俾人知禮義之不可不循則本正而末治矣郡邑之長嚴其條約懸書讀法使

民知憲度之不可不守則形端而表直矣鄉里之薦紳司其教誡則古稱先令民有所漸染手足有所步趨則模楷立而持循謹矣如是而風不日進於淳俗不日登於古者未之有也凡此數者理有相因初無二致泰交咏而後連茹者有同升之雅孝廉敦而後採風者上咸和之頌朝有一德之休則野無澆漓之俗士厲實行之修則民遵蕩平之治我

皇上勵精成裕於上六服承流望風於下直與堯舜之兢業以執中湯武之懋修以建極先後同源

創守一轍以凝景命而錫純嘏至近也以紹宏
模而鞏丕基至隆也時雍風動之治可臻綏邦
屢豐之績可奏咸五登三之盛直可以度越百
王哉

國家億萬年之業傳之無窮矣臣草茅新進罔識
忌諱干冒

宸嚴不勝戰慄隕越之至臣謹對

奉

天承運。

皇帝制曰。朕惟至治之世。君臣一心一德。郡縣大法
小廉。士尚躬行。農勤力作。用能盈廷師濟。吏治澄
清。教化洽而休養備。何風之盛也。朕撫臨區宇。夕
惕朝乾。冀內外臣工。共襄治理。以成邛隆之運。意
甚殷矣。孔子曰。臣事君以忠。人臣必有公正無私
之學。乃克盡忠誠不二之心。朕推心置腹。以待羣
下。每延見廷臣。必諄諄誥誡。凡厥有位。果能公爾
忘私。矢精白於隱微之地歟。其何以交相儆勉。共

遵蕩平正直之王道也。洪範稱有猷有爲有守。吏治以操守爲本。而非謀慮施設。無以濟之。朕慎簡大吏。下逮守令。皆務得人。誠欲其興事慎憲。有裨地方。匪直潔已自好而已。夫生事苦其紛更。而避事必至隳廢。操切患其滋擾。而優容又至養奸。何道而成明作惇大之治歟。王制樂正崇四術。立四教。順先王詩書禮樂以造士。其不帥教者。有郊遂之移。寄棘之屏。而論其秀者。則升之司徒司馬。而人材出焉。夫士爲四民之首。必敦尚學行。以倡風化。今或務華鮮實。甚者囂凌狙詐。豈漸摩化導。有未至耶。抑崇德絀惡。所當勸懲互用歟。古者勸農有官。力田與孝弟同科。蓋農務若斯之重也。我國家休養生息。數十年來。戶口日以蕃滋。而地畝止有此數。非講求農政。竭人力以盡地利。何以家給而戶足耶。朕欲地方大吏。督率有司。多方勸課。俾惰農盡力於作勞。曠土悉成爲膏壤。何道而可。夫朝臣絕黨援之私。則外吏從風。政多循績。士子勵廉隅之節。則小民務本。俗化敦龐。爾多士積學有素。其悉心以對。朕將親覽焉。

陳惠華

臣對。臣聞帝王之統御天下。而綿曆服於無疆也。必有其爲治之本焉。必有其致治之要焉。夫臣節不可以不砥。吏治不可以不清。士習不可以不端。農政不可以不勸。此數者。固治天下之大端也。而猶非其本也。抑猶非其要也。所謂本者何。人主之一心是也。所謂要者何。人主之以心行政是也。惟以心行政。則咨儆日深。雖公忠已勵。而猶慮其未勸也。澄清日切。雖官方日飭。而猶慮其未飭也。裁成之念日殷。雖士行已敦。而猶慮其未敦也。愛養之情日篤。雖民生已遂。而猶慮其未遂也。蓋一人憂勤惕勵於上。羣臣翼爲明聽於下。天工人代。庶績所以咸熙。朝廷有整理之規條。士民致恬熙之氣象。德業光昭。萬世所以永賴。由是廷臣無黨援之私。外吏有潔清之節。庠序之教育振興。閭閻之生養畢遂。馴至於仁風翔洽。河嶽懷柔。世進邳隆。化登上理。是唐虞三代之隆規。固不難再見於今日矣。

欽惟

皇帝陛下。

神聖開天。

中和立極。

秉聰明之德。內聖外王。

弘參贊之功。經文緯武。

崇儒重道。聿修釋菜之隆儀。

詢事考言。頻舉闈門之盛典。

垂裳而整百度。戢干戈。興禮樂。鴻圖炳若日星。

錫命以懷萬邦。捐租賦。慎祥刑。湛恩深同雨露。固

已庶徵協應。並獻嘉祥。景運弘開。咸歌復日。四

方於以底定。六府於以修和。上下於以有德。

之風。中外於以有重熙之象矣。乃

聖不自聖之意。彌勤夫疇咨。而安益求安之心。廣資

於獻納。爰進臣等於

廷。而策以為臣之道。作吏之方。與夫教士重農之

至計。雖懸鞞設鐸。何以加茲。臣弁鄙無知。至愚

極陋。何足贊

高深於萬一。然拜獻之初。仰承

清問。敢不俯竭愚誠。敬陳管見。耶。伏讀

制策有曰。人臣必有公正無私之學。乃克盡忠誠。不

二之心。而欲凡茲有位。公爾忘私。矢精白於隱

微之地。大哉

王言。此風勵臣工之至意也。從來世道之休盛。惟在於泰交。而臣職之靖共。一本於公正。幽獨之內。皆凜然於神明之鑒。而不敢稍萌一樹私植黨之計。然後謂之公。夙夜之地。皆肅然於帝天之臨。而不敢稍存一矯情飾詐之思。然後謂之正。故古純臣之事君也。精白乃心。恪共厥職。有朝夕匪解之忠。有表裏如一之誠。惟其無私故也。使今日廷臣承

皇上諄諄告誡之意。潔已以奉公。實心以任事。彼此交勵。在廷各獻其忠良。內外無他。居官咸趨於正直。同寅協恭。以和衷。而明良喜起。以成化。豈非都俞之盛事乎。

制策有曰。吏治以操守爲本。而非謀慮施設。無以濟之。其所爲吏治計者。誠至深且遠也。夫潔已自好。固爲吏之所宜。然士大夫報國庇民。期待甚遠。豈但高言狷介。遂畢乃事乎。必其興事慎憲。實裨地方。斯爲有體有用之學。故守也者。所以範其才。而廉也者。所以濟其能也。乃或以此悻悻自矜。沾名賣直。則不能無紛更捺切之端。否則硜硜自持。拘謹迂曲。又不免有避事養好之

弊。夫逞志於綜核。不可也。恃才以煩苛。不可也。畏憚以廢事。不可也。優容以滋弊。更不可也。則凡督撫大吏。與夫郡縣守令。是當仰遵我皇上之訓。寬以容人。平以制事。公以御物。敏以圖功。安靜樂易。與民休息焉。振興釐剔。與民更始焉。雖洪範所稱有猷。有爲。有守者。無踰斯矣。

制策有曰。士爲四民之首。必敦尚學行。以倡風化。此以見

聖王造士之心。爲加切矣。臣惟古之勸士者。有三物。六行之陳。有成。休董。威之具。使之漸摩於詩書。弦誦之地。沐浴於文章道德之中。故其時之爲士者。雖不盡非常之才。而斷不敢有不肖之行。而今之士異矣。所務者聲華厚利。而門內之實行不修也。所習者囂凌狙詐。而居稽之本務多荒也。是宜嚴其考課。禁其奔競。斥邪慝之行。而移遂移郊。重文行之儒。而鄉舉里選。庶師道克立。而善人自多也。卽如士行之優劣。每學各列一人。上之學臣。以示勸懲。其法至善。其道至公。惟令所在教官。徐以察之。詳以核之。於非僻之徒。嚴加懲劄。而端慤之士。急爲推崇。則善有以

勸惡有以懲。而士風翕然丕變矣。

制策有曰。古者勸農有官。力田與孝弟同科。而欲講

求農政。竭人力以盡地利。此誠如天之仁。愛民

無已之盛心也。臣惟古之勸農也。必使地無遺

利。而後農桑衣食之原以開。必使人無餘力。而

後耕耘收穫之道以盡。蓋多一逐末之民。卽少

一力田之民也。多一怠惰之民。卽少一率作之

民也。野有石田而不墾。是棄利於地也。田有豐

阜而不蒔。是委嘉穀於草莽也。詩曰。駿發爾私。

終三十里。亦服爾耕。十千維耦。言農政之宜修

也。是莫若責成於守令。守令者。親民之官也。守

令之勸課勤。則民樂其業。而趨事者自衆。守令

之董治嚴。則民畏其法。而怠作者自少。然尤在

大吏責守令。守令責百姓。臣未見上有督率之

人。而惰農猶不作。曠土猶不開者也。用是主伯

亞旅。爭力田間。而磽确斥鹵。盡成沃壤矣。足民

裕國之計。孰有外於此者乎。凡此皆治國家之

重務也。然臣更有請焉。竊嘗盛懷王道。而知為

治之方。總不外此數大政。而立政之本。總不外

此一心。蓋有純王之心。斯有純王之政。言心之

可以立政也。有關雎麟趾之風。斯可以行周官之法。言政之必本于心也。故潤色粉飾之文。皆盛世所羞言。而王者所不尚。惟

皇上以整飭臣工爲心。斯贊采宣猷而無不砥節也。以澄敘官吏爲心。斯大法小廉而無不盡職也。以敬教勸學爲心。斯品正行端而無不尚實學也。以重農務本爲心。斯家給戶足而無不歌大有也。由是時雍風動之治。可臻綏邦屢豐之慶。可奏久安長治之效。可以綿亘萬年。深仁厚澤之施。可以並隆三古。休徵滋至。天命因之。而益

凝。至德淪浹。人心由之而永固。則我

國家悠久無疆之業。基於此矣。臣草茅新進。罔識忌諱。干冒

宸嚴。不勝戰慄隕越之至。臣謹對。

王安國

臣對臣聞帝王之丕承休烈而致久道化成之盛也。必有學問純正之臣。精白乃心。以贊襄左右。而後股肱起而萬事康。必有經濟弘遠之才。以分理庶民。百後百職修而阜成奏。必使詩書之澤陶淑乎士類者。深而論秀書升。國家始收

養士之報必使衣食之恩經理乎民生者備而
厚生正德四方始仰化日之舒蓋輔弼之臣視
所學學之既正則爲君爲民皆靖共以風有位
也疆理之任視其才才之既優則興事赴功皆
從容以致化理也造士之規以嚴爲貴爲師儒
者勸懲交施斯賢者既興於善不能者亦觀感
而化也勸農之道以勤有功任司牧者督課兼
至斯沃土旣興於利而瘠土亦力穡有秋也唐
虞三代所以化起朝廷而風行四海上下交而
志無不同庶官治而政無不立庠序之樂育以
廣閭閻之休養以足用能使宇內向風人民和
樂諸福畢集天休滋至邛隆之治實由乎此也
欽惟

皇帝陛下

離照重華

乾符廣運

旌焉安焉之謂聖道貫三才
鼓之舞之以盡神德化四表

吳命申而敷陳彛訓斂福以錫民極蕩蕩平平
泰交洽而咨儆臣鄰敕幾以亮天工兢兢業業

臨辟雍以興正學經輝孔壁士樂泮宮看橋門濟
濟霞蔚雲興爲天下得人網盡中原麟鳳

耕帝藉以卽田功天降嘉禾人歌秉穗登化國栩
栩蒲瞻杏望以小民永命澤沛萬井桑麻固已
民盡安物盡阜升斯世於大猷猶復旰而食宵
而衣詢芻蕘以一得蓋

聖不自聖之念望道彌殷故安益求安之心咨訪逾
切進臣等而策以訓臣之道飭吏之方振士習
以興才務民功以厚養以臣愚陋何足知此然

恭承

清問對揚伊始敢不竭管窺之見以爲拜獻之資乎

伏讀

制策有曰人臣必有公正無私之學乃克盡忠誠不
二之心凡厥臣工果能公爾忘私矢精白於隱
微之地大哉

王言誠萬古獎勵人臣之極則也書曰天工人其代
之又曰同寅協恭和衷哉古之人君憲天出治
旣弘一視之仁歸萬物於陶鑄人臣爲君分職
亦猶四時之吏敷元化以昭宣惟天無私故人
臣必以公滅私方可承式乎一人惟天無妄故

人臣必盡忠無妄始能可質於幽獨是惟平日
之所以爲學者好惡之原先盡去其自欺之處
然後今日之所以事君者隱微之地亦克矢其
勿欺之心此臣職所以修百工所以釐也我
皇上至誠率物精勵作人待大臣以腹心體臣如手
足使立政九官共矢公忠在廷三事悉化偏黨
聖謨洋洋已無不是訓而是行矣更欲其交相儆勉
共遵蕩平正直之王道凡厥有位疇不重念生
成凡爾百寮疇不願全名節無營私無植黨念
慮之間天理爲昭不負君不負學衾影之內帝

天式鑒將近希宋儒非正心誠意不敢爲入告
之忱遠比五臣共都俞吁咈以交勉於齎颺之
盛矣至於生事則患紛更避事則多隳廢揅切
易於滋擾優容又致養奸吏治之需才誠有足
煩

聖慮者臣考周禮之計吏以廉也廉法廉能必取其
相劑洪範之羞人於行也有猷有守必期於適
用爲保障不爲繭絲尹鐸所以見推於千古有
盤根斯別利器龔遂所以利濟於一時若夫勞
於撫字固足以示循良拙於催科將無濟軍國

陽城之言以矯一時之失未可爲定法也我
皇上用賢無方知人作哲其於各省大吏及守令之
官旣擇之明課之審矣誠使封疆之臣及郡縣
之長能正色率屬潔已愛民不徒以喜事矜才
能率作興事精勤赴功不徒以清操爲奇節則
才守兼優設施有濟躋斯民於太和而無難矣
夫守令之賢由於大吏大吏之賢視乎在廷
制策所謂朝臣絕黨援之私則外吏從風者此也又
讀

制策有曰士爲四民之首必敦尚學行以倡風化今
或務華鮮實甚者囂凌狙詐所當勸懲互用此
誠萬世課士興賢之良規也古者庠序之教課
以文必考其行周禮三物六行四術四教皆其
具也古者學校之法示以勸兼示以懲書曰侯
以明之撻以記之亦其徵也其人司成司樂其
時三年九年所以漸漬而磨礪之者良非一日
矣我

皇上崇儒重道愛士遴才弘闢門之盛典登庸者旣
昂首雲霄出內府之金錢下第者亦溫噓道路
經術優崇人思振藻官方清肅士慶彈冠值茲

千載難逢之盛猶有自外名教之思苟有人心
寧忍出此夫化導莫親於教職而校試獨任之
學臣誠使居教職者仿蘇湖之教法效白鹿洞
之成規終歲則別士之賢否上之督學以分校
之爲學臣者考之以專經核之以節行三年則
分士之優劣上之內部以黜陟之勸懲並行文
並茂行並修何患士習不進於古歟至於講求
農政竭人事以盡地利使家給而戶足

制策所云尤重民足食之至計也嘗考虞帝涖政之
初首咨夫十二牧周家養民之政總成於大司

徒田峻之喜載詠豳風保介之咨序先訪落蓋
六府皆以成穀而入政莫首於農故國富每因
乎民足閭閻一日之旦晚關豐歉於倉庾而小
民常慣於貪天婦子手足之經營視親勞於長
上我

皇上重念民依周知稼穡老農示以優禮力田加之
賞勸

特命各省親民之官遍歷田間親與勞苦廣行補助
行將開屯郊輔墾地近邊其講求於農政者雖
三代盛時豈有加於是哉但使司民牧者實意

體行盡心督勸將見耕穫以時而盈寧常保享
休和之福而永永無極矣夫上物之愛厥心易
臧故農政卽關乎風俗而風俗必由士以倡之
制策所云士勵廉隅之節則小民務本俗化敦龐者
此也總之

皇上以聯宮府廣翕受爲心而諸臣之矢心報國以
致惇大成裕之俗者宜何如其加勉也

皇上以敦士風恤邦本爲心而諸臣之加意董勸以
成化行俗美之風者宜何如其盡心也堂廉一
德中外承休咸三登五天人協瑞馴百靈而集

百福嘉邦而慶萬年我

國家太平翔洽之化基諸此也臣草茅新進罔識
忌諱干冒

宸嚴不勝戰慄隕越之至臣謹對

汪德容

臣對臣聞帝王之法天敷治而致萬年有道之
長也必有以啓泰交之良遇聚股肱耳目以大
賡歌颺拜之風必有以勵大小之官方舉清慎
公平以昭翼爲明聽之盛必有以正多士之行
習萃孝秀賢良以弘學校膠庠之化必有以滋

兆民之生植合含哺鼓腹以成家給人足之休
是惟心膂之交孚則都俞相慶明良會而志氣
可通也是惟官聯之必飭則循良報最庶績凝
而事功可舉也是惟董率之有方則去華就實
儒行正而經術可興也是惟勸課之有道則用
天因地穡事興而農政可修也蓋其所以經緯
而條貫者以一誠握其樞而其所以緝熙於宥
密者以一敬操其要誠至則物皆就理敬立而
百志惟熙自昔唐虞三代之君喜起慶於一堂
職業修乎百爾風教基於多士盈寧徧於兆人
至德廣運而功業日以崇宏大化覃敷而物華
昭其瑞應所謂體天之道治世之符蓋在乎此
欽惟

皇帝陛下

道協中和

德弘參贊

文思光被千百國雨露均華

武畧宣昭億萬里風霆順軌

英命申而敷陳彛訓無偏無黨勅幾以亮天工
泰養洽而咨儆臣鄰懋賞懋官賜福以綏民極

東漸西被北燮南諧蕩蕩平平集四海之共球筐
篚羣瞻雲日之光

禮序樂和仁育義正熙熙皞皞萃兆姓之富壽康
寧共沐和恒之化固已治教覃敷純禧孔固天
地之間被潤澤而大豐美六合之內聞至治而
皆徠臣矣乃

聖不自聖安益求安進臣等於

廷而策之以堂廉一德職業交修士行醇良民生
富厚之道臣至愚極陋何足以仰酬

清問然當拜獻之始敢不竭芻蕘之一得乎伏讀

制策有曰人臣必有公正無私之學乃克盡忠誠不

二之心凡厥有位何以交相儆勉共遵蕩平正

直之王道此誠萬世明良相慶之盛心也夫資

始統天謂之乾乾君道也順承天施謂之坤坤

臣道也乾坤合德謂之泰泰者上下交而志同

君臣一體之盛遇也是以謨載同寅訓傳一德

其靖獻者在精白之實心其蓄積者在公忠之

實學蓋精白則內念清明而書思對命之下有

誠樸而無詐虞矣公忠則居心專一而庶明勵

翼之儔有中正而無私阿矣古純臣之事君必

本於生平之所學者此也我

皇上尚賢選能推心置腹所以勵羣臣精白之懷作
百爾公忠之志者至矣顧進思盡忠者所以矢
篤棊之忱義無私比者必嚴於心術之際體此
意以事君則嘉謨入告而志意可以上孚體此
意以蒞官則竭力盡能而精誠可上達夙夜有
一心而後廢歌有一德乾坤泰交之盛胥於是
乎成矣

制策有曰吏治以操守爲本而非謀慮設施無以濟
之欲其興事慎憲有禪地方以成明作惇大之
治此誠萬世整飭官方之至意也夫盛世旌別
之典馭吏馭士而兼以馭官人臣拜獻之忱有
猷有爲而歸于有守是以考課有常經備四善
者爲最察吏有定法統六計者惟廉廉固居官
之首重矣然而人臣之職所謂爲上爲德爲下
爲民者豈僅潔一已而已哉清心寡欲以弘澹
泊之風則爲政之本立出謀發慮以勵明作之
氣則爲政之用行斯無忝厥職而人臣事君之
道可盡也我

皇上勤求治理澄別官方獎勵廉隅率作興事洵陸

列上甲辰禾
贊所謂順輪桶之用而在直無棄材適遠近之
宜而駑驥無失性也居官者誠能正直輔以節
儉則羔羊素絲之度昭矣安靜濟以奮庸則民
生國計之慮周矣和平則自無操切生事之患
勤敏則自無避事優容之失簠簋飭而庶司守
清白之操職業修而百姓蒙教養之澤豈非吏
治之極盛哉

制策有曰士爲四民之首必敦尚實學以倡風化今
或務華鮮實豈漸摩化導未至抑崇德黜惡所
當勸懲互用此誠萬世振興士行之良規也夫

士行者風化所自起而勸懲者士行所由興古
者立大學以教於國設庠序以化於邑比年入
學中年考校法如此其詳也論定而官任官而
爵意如此其厚也移遂移郊侯明撻記慮如此
其周也夫其所以如此者誠以士居四民之首
必士習端而後民風可厚也是以著誠去僞以
爲聖賢之歸則實行不貴乎虛聲正本澄源以
守道義之正則文莪不先乎器識孝弟力田之
士必遠浮囂茂才異等之科胥歸醇謹有由然
也我

皇上操主持風教之權弘戒休董威之道禮崇聖哲
職重師儒凡以正士行厚風俗也而士猶有未
盡醇者則虞書所謂格則承之庸之否則威之
者斯固勸懲互用之法也夫法或出於懲惡而
意則欲其從善此固聖人之微旨而又採先儒
經義治事之條鵝湖鹿洞之義相與講明切究
俾知有所勸勉愧恥以正其趨將見士習旣端
而民風丕應矣

制策有曰國家休養生息戶口日滋而地畝止有此
數欲講求農政竭人力以盡地利使家給而人
足此誠萬世子養億兆之盛軌也夫國以農爲
本而民以食爲天是以政在養民爲利用厚生
之大務食哉惟時實柔遠能邇之本圖周禮遂
人匠人稻人之職法極其周詳周詩豳風豳雅
豳頌之文義歸於勤動凡以竭三時以趨天必
播五穀以盡地而苟不勤於力穡安望倖獲夫
豐盈此農政之不可不講也我

皇上耕藉祈年勸農重穀講井田之法求水利之宜
所以惠養元元者至矣有司誠能以實心奉行
則躬親教導而無曠土自無游民省察地宜而

有治人益興治法將見民安耕鑿而戶有益藏
矣凡此者事有相因理無二致而皆由我

皇上剛健篤實以立其誠欽明恭讓以主乎敬以勵
一德至和也以飭官方至肅也以端士行至醇
也以遂民生至厚也將見化理弘敷嘉祥協應
天地順而四時當民有德而五穀昌本體信達
順之功至重熙累洽之盛我

國家萬年有道之長基諸此也臣草茅新進罔識

忌諱干言

宸嚴不勝戰慄隕越之至臣謹對

天承運。奉

皇帝制曰。朕仰荷

上天

列祖眷佑之隆。

聖祖仁皇帝付託之重。臨御以來。勤求治理。日與羣臣
訓誡咨儆。切加勉勗。惟期篤元首股肱之誼。育膠
庠塾序之材。吏治實底於澄清。民生共登於殷阜。
朝乾夕惕。旰食宵衣。此念無一刻釋於懷也。人君
奉天出治。而贊化端賴臣鄰。人臣體國奉公。而分

猷必資羣力。惟君臣聯爲一體。故公爾忘私。國爾忘家。而明良之慶以成。僚采聯爲一體。故善則相勸。過則相規。而協恭之美以著。朕推誠布公。實視百爾臣工爲一體。而諸臣之事君者。果能盡一德一心之道。而無慚於幽獨歟。又何以使同朝共事者。絕黨比之私。化畛域之見。以臻師師濟濟之盛歟。國家所以重士者。以士之能自重也。故必端其所習。而後鄉黨視爲儀型。風俗資其表率。乃或囂凌詐僞。于犯名教。習於曲學。而不循正道。驚爲浮薄。而不敦實行。士不自重。而里巷小民。從而輕之。且

相率藉口而倣效之。士習未端。安望民風之歸於厚乎。今欲使讀書之人。爭自濯磨。澡身浴德。悉爲端人正士。以樹四民之坊表。必何道而可。守令爲親民之官。百姓之休戚係焉。古之稱循吏者。必以惠羣黎。端風化。爲要務。故里社之樹藝。咸載史書。物類之感孚。皆徵治化。以至誠惻怛之實心。盡父母斯民之實政。剛柔相濟。教養兼施。斯不愧循良矣。朕欲百姓乂安。風俗淳美。果何道而使司牧皆得其人。以收實效歟。抑大法小廉。必端本於大吏之倡率歟。若夫民爲邦本。食爲民天。勞民勸相。以

盡地力。自古重之。蓋本業勤。則衣食之源裕。俯仰足。則禮義之化興。正民之德。必先厚民之生。良有以也。海宇承平日久。休養多年。戶口愈繁。生齒愈衆。而地不加廣。自非人盡上農。何以使倉廩足而婦子寧歟。然則欲使野無不墾之士。國無遊手之民。不事末利。而專務恆產。爲民牧者。必如何勸勉。鼓勵。而後見豐亨豫大之休也。夫朝宁有喜起之風。則萬邦黎獻。觀感奮興。而野多俊乂矣。長吏樹撫循之績。則寰宇蒼生。養恬耕鑿。而戶樂豐盈矣。爾多士留心經濟。其詳著於篇。朕將親覽焉。

彭啓豐

臣對臣聞帝王之憲天出治而致萬年有道之長也。必有以啓泰交之良遇。使廊廟黼黻之佐。共彰師濟之休風。必有以弘選造之良規。使膠庠陶淑之儒。共贊文明之雅化。必有以飭天下之吏治。使爲民司牧者。克奏撫字循良之績。必有以厚天下之民生。使務本力作者。自致豐亨豫大之模。是惟心志之交孚。則明良一德。而元首股肱之誼。可叶賡歌颺拜之風也。亦惟文行之並飭。則藹吉聿彰。而讀書稽古之功。可備論

秀書升之選也惟上之慎銓選者殷斯大法小
廉無不鼓舞於功名之地以爲報稱之資也惟
上之念阜成者切故利用厚生莫不熙皞於耕
鑿之天而成太平之治也自昔唐虞三代之隆
兢業於萬幾基命於宥密用能光昭德業弘敷
化理使臣鄰協贊俊乂畢升庶司有亮惠之猷
百姓沐養恬之澤由是協於上下以承天庥諸
福之物可致之祥莫不畢致者其道悉由於此
欽惟

皇帝陛下

乾德體元

泰符凝命

建中和之極內聖外王

端誠敬之原參天兩地

聲教暨東西南朔河清海宴開六字之昇平

文明被禮樂詩書璧合珠聯映三光而麗照

啓經筵而崇正學菁莪籲俊棫樸儲才看葢榜南

宮士氣懽騰咸沐九霄湛露

耕藉田以勸農功瑞麥呈祥嘉禾獻慶望芾簷蔀

屋民風和洽徧滋萬井陽春固已治教覃敷純

禮孔固天地之間被潤澤而大豐美六合之內
聞至德而皆徠臣矣乃

聖不自聖之意彌殷於累洽重熙而安益求安之心
愈切於疇咨博訪進臣等於

廷而策以堂廉一德俊彥承風吏治循良民生康
阜之道以臣愚陋何足知此然恭承

清問對揚伊始敢不竭管窺之見以爲拜獻之資乎
伏讀

制策有曰人臣體國奉公而分猷必資羣力欲其盡
一德一心之道臻師師濟濟之盛此誠萬古明

良交泰之隆情也易曰上下交而志同書曰謨

明弼諧惟君臣聯爲一體故貴以公爾忘私國

爾忘家者勵翼爲明聽之誠惟僚采聯爲一體

故當以有善相勸有過相規者誌同寅協恭之

雅蓋對揚休命必返諸夙夜之欽承故不以文

貌相將而惴忱始篤也風示羣僚必先建大廷

之丰采故不以聲氣相援而精白始著也我

皇上推誠布公視臣鄰如一體敕幾宣訓孚弼直於

一心則凡夙夜自公者誰不感高厚之鴻恩執

簡待漏者誰敢忘靖共之素志由此而正直自

雍正丁未科
三十一
矢於隱微之地悉去其偏私公溥同人而念慮
之間胥化其畛域無偏無黨遵王道之蕩平推
賢讓能致庶官之輯睦仰承

聖訓之煌煌而與僚采共相勉於匪躬之誼則泰交
之盛於是乎成矣

制策有曰士必端其所習而後鄉黨視爲儀型風俗
資其表率此誠萬世鼓勵人才之至意也竊惟
古之造士者有三物六行之陳有黨正閭師之
設力田與孝弟同科對策以賢良爲首凡欲養
其忠厚誠懇之性而導以仁義中正之修故爲

士者不患文辭之不工而患道德之不實務當
循正道以維持乎名教無容泥曲學而自越其
範圍我

皇上愛士育才頻施曠典章縫挾策之儒罔弗振興
鼓舞而又董師儒之官庠序之教誠欲使誦
讀古訓者悉爲端人正士以示四民之坊表也
夫士習未端民風不可得厚而欲濯磨於一旦
必先教育於平時是在爲師儒者倣胡瑗經義
治事之法兼朱熹分年考校之經核其賢否樹
之風聲則師道立而善人多矣

制策有曰守令爲親民之官必以惠羣黎端風化爲
要務蓋澄清吏治之思莫切於是矣夫周禮之
計吏也廉善廉法更取其廉能洪範之程人也
有猷有爲總歸於有守若勤勸農種化導鄉人
循吏傳中殊多可紀蓋必有至誠惻怛之實心
以行父母斯民之實政斯剛柔相濟而性情不
失諸偏苛教養兼施而治術無虞其闕略也我
皇上知人善任慎簡廷僚務使人地相宜才猷具備
故爲吏者鮮不恪恭厥職思所以報最於三年
而百姓已皆乂安風俗已皆淳美矣乃猶以得

人爲兢兢豈非安益求安之至計歟夫守令爲
親民之官其所以厚民生者在乎勸課農桑使
閭里足於衣食其所以正民德者在乎振興禮
樂使庠序不輟詩書由是入境採風而襦袴興
謠書名紀績而睽常晉秩雖古之循吏何以加
焉禮曰大臣法小臣廉督撫倡率於上守令承
風於下惟大吏能正已率屬斯小吏皆守法奉
公是又其本也

制策曰民爲邦本食爲民天而欲使倉廩足而婦子
寧此誠足國裕民之良模也蓋聞禮義生於富

足豫大本於豐亨是故周禮遺人廩人之職常
使野有蓋藏而戶多蓄積周詩豳雅豳頌之篇
惟聞俶載南畝而田畯至喜今欲野無不耕之
土則所以經營於樹藝者非一手一足之烈也
欲國無游手之民則所以董勸其習勤者有來
咨來茹之命也

皇上軫念民依周知稼穡舉耕藉之典開水利之宜
凡以生齒旣衆則仰食者多而欲人人不趨末
利事恒產而爲上農也誠使爲民牧者勞農勸
相巡行於畝畝之中因地乘天廣示以耕桑之

利協風始至而播穀維勤膏雨旣零而于耜悉
舉則粳稻豐登倉箱有慶無事議積貯之方施
補助之典而家給人足不已貽樂利於無窮歟
夫朝廷之上庶尹克諧襄拜手賡歌之盛則萬
邦黎獻莫不志切觀光而濯磨砥礪矣寰宇之
廣長吏撫循竭奉公體國之誠則海隅蒼生無
不共沐和恒而熙皞自得矣效有相因而理無
二致惟在我

皇上以法天行健之心大憲天出治之政則臣鄰交
儆而風動時雍庶績咸熙而民安物阜由是九

功歌敘昭平成清宴之祥萬福凝承觀日月升
恒之慶金甌鞏固玉燭常調我

國家萬年有道之長基於此矣臣草茅新進罔識

忌諱干冒

宸嚴不勝戰慄隕越之至臣謹對

鄧啓元

臣對臣聞帝王之體備三才而撫綏兆民也其

綱紀天下者有政其綜理天下之政者有心而

其所以實體於心與政之間者在此主敬之宥

密有以統貫於不息是故敬以勵臣隣雖當明

良合德之際而咨微之勤所以協喜起於賡歌

者未嘗一念不省其成也敬以端士習雖當髦

俊鼓舞之日而訓飭之嚴所以正風尚於庠序

者未嘗一日不求其全也敬以清吏治凡在司

牧之任者皆欲其底於大法小廉而懷保惠愛

具見其惻怛之意使羣黎咸賴以乂安敬以務
民依比在耕鑿之中者皆欲其躋於家給人足
而厚生正德永著夫利濟之模使民俗羣資以
殷阜蓋一人以主敬立極者運於廟堂而羣工
亦以主敬直內者推諸士庶則謨明弼諧而臣
職克盡履仁蹈義而士行克修政平訟理而吏
多循良樂事勸功而國無游惰自昔唐虞三代
之治所以運致邛隆治協休嘉舉皆由於此也
欽惟

皇帝陛下

德隆參贊

道貫苞符

睿智聰明總萬幾而萬方在宥

聖神文武御九有而九敘惟歌

剛健以協乾行敬德日躋單心曰明曰旦

繼述以弘泰運孝思維則永念丕顯丕承

溯心法之淵源惟精惟一兼堯舜周孔而集其大

成煌煌乎金聲玉振

昭治功之巍煥作君作師統侯甸要荒而溥茲渥
澤浩浩乎乾始坤成固已體內聖外王以綏猷

兩儀位而萬物育符藏用顯仁以建極八政舉
而五福敷玉燭調四時之和毓嘉祥於寰宇靈
瀆表萬年之慶叶景貺於圖書矣乃

聖不自聖恒切於疇咨安益求安廣咨於獻納爰進
臣等於

廷而策之以君臣一體士習克端吏必欲其得人
民務使之足食之道臣愚何足以知之然拜獻
之始仰承

清問敢不竭芻蕘之見以答

高深於萬一乎伏讀

制策有曰贊化端賴羣臣分猷必資羣力務盡一德
一心之道而幾於師師濟濟之盛大哉

王言萬世臣道之良規也人倫之大者莫先於君臣
聖人作易首乾以明君道次坤以明臣道誠以
臣道貴乎純一而不二如坤之順承天施者乃
不愧乎贊化分猷之誼焉爲人臣者誠凜乎靖
共匪懈之訓王事重而宣力在所必勤若耳目
股肱之聽命於元首而無所強也則明良之慶
成矣誠知乎僚友和衷之道公義嚴而私恩在
所不顧使是非可否之必互爲勸規而無所比

也則協恭之休著矣蓋非適已自便阿意徇物而後爲臣道之羞第矯節沽名飾情干譽而卽爲臣心之累故所貴乎一體之美者在心術不在事功在隱微不在廣衆幽獨之地必皆敦其篤棊之忱也夙夜之中必盡去其翊比之見也我

皇上推心置腹所以待臣下者直如家人父子凡屬在有位者誠宜積盈缶之孚矢正直之節當拜揚則思乎協贊處同僚則盡其勸懲庶有以副撫辰凝績之任矣

制策又曰士必端所習使民視爲儀型資其表率仰見我

皇上維風整俗之至意也古之爲士者居黨庠術序則思正心誠意之學迨服官立政尤勤謹身寡過之修非先王之法言不敢言非先王之法行不敢行惟其爲士而自重也人亦相與重之故所貴乎爲士者爲其以敦本尙實爲切務以飭躬礪行爲要圖然往往有誦詩讀書而所行多違者何也無體察日用之功而徒爲釣名沽譽之計則入聞道德而悅出見紛華而喜矣欲正

士習者莫若先端乎士品鎖闥棘院之中務得
良才使投刺干謁不得逞其僥倖之志論官受
爵之下務求實行使雕蟲末技不得肆其浮夸
之爲由是士品正者其舉動皆正播笏朝端則
無恣已行私之弊樹範鄉里可免蕩檢踰閑之
譏而士大夫之風氣醇矣若其養之於平日者
則必明學校以道之擇師儒以董之課督以嚴
約束以法使本於躬行心得之餘而著爲履中
蹈和之矩則坊表立而民行興矣

制策又曰守令爲親民之官必剛柔相濟教養兼施
斯不愧循良而要歸於大吏之倡率此誠官方
之所由肅而民俗之所由賴也夫守令有父母
斯民之責而其與民親也視督撫爲倍切蓋以
其地相近其情易通也然而得人以任其職爲
最難簿書會計理煩者遂能辦之徵發催科明
敏者亦優爲之至於休戚與百姓相關旦夕以
民依爲念剛而不失之過猛也柔而不流於過
寬也容保教思之兼盡也則必慎擇夫有猷有
爲有守者而任之有猷有爲者才足以運其德
一張一弛皆出以經濟之良法而端方曲謹之

操不至拘守於一隅有守者德足以養其才廉
善廉能皆凜以清潔之小心而智名勇功之事
歸之內省而不疚而又必實驗之立身行己之
間必實察之道德政事之際務使大吏之倡率
必端而小吏之奉行惟謹斯有以體乎仁育義
正之模而克盡父母斯民之責矣

制策又曰民爲邦本衣食爲民之天欲使倉廩足而
婦子寧誠愛民無已之盛心也唐虞之世地平
天成六府允治而所重惟穀成周之時體國經
野九職任民而所先在農蓋衣食之源裕而後

禮義之化興也我

皇上宵衣旰食加惠黎元日以稼穡艱難爲孜孜旣
廣開溝洫而野無曠土亦多方勸勞而民有常
業矣猶以承平日久戶口愈繁宜增闢地利以
制民產臣以爲當使地方官循行國邑周視原
野因寒煖燥濕之宜隨山川沮澤之勢凡可以
生九穀任萬民者曲爲之營謀詳爲之經理倣
月令修利堤防導達溝瀆之法以行之地有乃
宣乃畝之休民獲計甫田之惠則千倉萬箱之
慶益裕而型仁講讓之風益隆矣凡此者治本

相因理惟一貫故朝廷有純臣卽學校有良士
長吏多淳治卽百姓獲安全而皆由我

皇上以主敬之心爲法天之學儆都俞而明激勸一
敬之存存也簡賢能而興樂利一敬之疊疊也
治化洽而休徵至我

國家萬年有道之長基諸此矣臣草茅新進罔識

忌諱于冒

宸嚴不勝戰慄隕越之至臣謹對

馬宏琦

臣對臣聞帝王之受籙膺圖而躋天下於仁壽
之域也將與天地同其廣運與日月並其升恒
與河山共其悠久而要其所以敷治者有本焉
所以致治者有要焉本者何人主之心是也要
者何人主之以實心行實政是也惟以實心行
實政則統馭臣鄰雖一德之交孚猶不忘咨儆
之忱也振興文教雖菁莪之蔚起猶曲示鼓舞
之術也澄清吏治雖綜核之無遺猶必使法廉
之共効也勸課農桑雖倉箱之有慶猶必使鞠

謀之咸周也蓋措施非徒文具而經綸一本至誠誠蘊於恭已垂裳則湛然者太極之全體誠達於紀綱百度則燦然者皇極之精醇太極立而德無不統皇極運而業無不該由是臣工戢黨援之私師儒勵孝廉之實司牧良而恩威互濟民生厚而俯仰俱寬唐虞三代之隆師濟揚休譽髦著美外吏之官方時敘兆民之蓄積饒多國家有道之長永永無極固有基諸此者矣
欽惟

皇帝陛下

道宏參贊

德懋中和

緯地經天光被海隅日出

誠民育物治臻風動時雍

純孝深繼述之思顯承勿替

至誠協陰陽之撰宵旰彌勤

隆交泰於堂廉吉士吉人共美鳳凰之翾翾

廣教思於庠序有造有德咸歌棫樸之芄芄

調玉燭而建三才和風甘雨瑞麥嘉禾巷舞衢謠

永綿億萬年之寶曆

麗金甌而凝五福璧合珠聯河清海宴嵩呼華祝
長貽千百世之鴻庥固已運際重熙化成累洽
六宇煥文明之彩蕩蕩難名九天揚景慶之輝
巍巍莫並矣乃

聖德淵冲疇咨逾切進臣等於

廷而策之以協恭之誼崇實之修與夫吏治民生
之至計臣之愚陋何足以仰承

清問然當拜獻之初敢不敬陳管見以對揚

休命乎伏讀

制策有曰人君奉天出治而贊化端賴臣鄰欲使一

德一心以臻師濟之盛大哉

王言誠千古臣道之極軌也臣聞唐虞之世天工時

亮二十有二人成周之隆吉士王多三百六十

屬詩曰夙夜匪懈以事一人易曰王臣蹇蹇匪

躬之故所謂公爾忘私國爾忘家臣道誠莫先

於此至於僚采聯為一體而勸善規過以共襄

邇理則不外同寅協恭之一言盡之夫協同者

豈朋黨比周之謂歟無亦寅畏恭敬故偏私不

存和衷共濟臯陶所陳臣之鵠也抑聞之宋臣

司馬光曰生平無事不可對人言此謹獨之學

也卽靖獻之本也人臣體此意以事君則獨寢
不媿衾獨行不愧影可以盟幽獨可以對大廷
矣齟齬非立異茹納非黨同可以質神明可以
酬君父矣

皇上開誠布公所以待臣下者直如家人父子則二
三大臣自有公忠體國而不復存阿比畛域之
私者於以廣明良而歌喜起豈不休哉

制策有曰士必端其所習而後鄉黨視爲儀型風俗
資其表率茲欲令人自濯磨澡身浴德以樹表
坊所以爲士習民風計至深遠也古者家有塾

黨有庠州有序國有學其所以陶冶一世之材
者非導之以六德六行卽順之以四術四教也
而又有中年考校之法而又有移郊移遂之條
彼旣見於爲善之可樂而又休於爲不善之無
所容是以先王之教不肅而成其政不嚴而治
今則士所習者無用之學而門內之行不修也
所驚者無實之名而本原之地多闕也甚或囂
凌詐僞干紀名教貽玷儒林抱慚鄉邑士品之
不端非司教者之責而誰責哉我

皇上雅意作人開科廣額復令學臣保舉孝廉振士

氣而勵士節者至矣近更於教官亦精其選豈
非以風氣之轉移視乎師儒之董率爲師儒者
果能做安定經義治事之制或立考亭分年治
經之科上賢以崇德而士知所奮簡不肯以絀
惡而士知所懲士習端民風茂矣卽何治之不
古若也歟

制策有曰守令爲親民之官司牧得人弘收實效而
其本則在於大吏之倡率此更見我
皇上澄敘官方之至意也蓋百姓之命繫於有司而
有司之命又有繫之者漢時重郡守之任故郡

守得以行其志而循良之績茂至唐則輕刺史
之權故刺史不得就其功而保障之風微夫令
之上有守守之上有監司督撫其所得爲者已
僅矣而簿書期會之間又將避過之不遑則欲
其惠羣黎而端風化豈可得哉記曰大臣法小
臣廉大臣倡於前小臣應於後矣昔李膺按部
而貪墨爲之解官楊綰登朝而勲戚爲之撤樂
風聲所樹正非偶然則惟內外大臣各以正已
率屬者爲郡縣倡而守令之治必有果以至誠
惻怛之心行父母斯民之政者矣

制策有曰海宇承平日久戶口愈繁欲使野無不耕
之士國無游手之民責在牧民者之勸勉鼓勵
此益見我

皇上如天之仁愛民無已之盛心也改諸月令出舍
東郊首咨田峻循行縣鄙繼命司徒迄乎休老
勞農而其事始畢蓋農政若斯之重也今天下
生息日益多經理亦日益備牧民者孜孜焉爲
民之衣食計而惠卒有未徧者其咎安在則地
有遺利民有餘力生穀之土未盡墾而游惰之
民未盡歸農也於此而戶慶豐盈人歌樂利是

仍在督撫守令加之意而已蓋有以勸勉之則
本業勤而衣食之源自裕有以鼓勵之則俯仰
足而禮義之化可興久安長治之基豐亨豫大
之福有積於一日之圖謀是果承流宣化者責
也要之上有誠正之臣則內外之官方自飭下
有純修之士則閭閻之富教必周而皆由我
皇上以法天行健之衷勵憲天出治之學實心實政
一以貫之內聖外王體周具備詩曰罄無不宜
又曰如川之方至以莫不增可爲

聖主福祿永綏寢昌寢熾之頌矣臣草茅新進罔識

忌諱干冒

宸嚴不勝戰慄隕越之至 臣謹對

